

Date – 04/01/2025

Time - 18:30 Hrs

1. Chief Minister Pu Lalduhoma'n Zofate chawr chhuahna in ang lo karah, hnam tobul dik tak chhui chhuah a pawimawh tih a sawi.
2. Transport Department chhinchhiah danin kum 2023 atanga kum 2024 March inkarah lirthei 30,295 ziahluh thar a awm.
3. India rama Generation Beta nau piang hmasa ber chu Mizorama mi a ni.
4. India nuclear scientist lar, Dr. Rajgopal Chidambaram-a chu tukin khan Mumbai-ah a thi.

<><><>

CM

Chief Minister Pu Lalduhoma'n Zo fate chawr chhuahna in ang lo karah hnam tobul dik tak chhui chhuah a pawimawh tih a sawi.

Dr. Selbuanga Foundation (Sel Foundation) te bultuma siam, mithiam pali te'n a zirchianna behchhana an ziak "Mizo History leh Sailo Lal Ropuite: Vandula leh Ropuiliani" chu vawiin khan Chief Minister chuan Aijal Club ah a tlangzarh a. Hnam tobul chhui chhuah ngaih pawimawh a tul thu Chief minister chuan sawiin Zofate chawr chhuahna dik tak chhui chhuak turin sorkarin hma lak a tum a ti a. Hetah hian mi thiam team dinin hmun hrang hrang atanga Mizo history zir a, lak khawm a tul a, hemi tur hian ruahmanna kalpui a nih thu a sawi.

Chief Minister chuan Mizo thlahtute chungchang Sawi dan hrang hrang awm thin chu zirbingna mumal tak nen khawi atanga Lokal Nge an nih tih chu pawm dan inang neih a ngai tih a sawi bawk.

He lehkhabu hi MZU-a zir chhuak tawh leh thawktute ziah niin Rin thu nilo a zirbingna nen thlapa hnam thil chhui a ziah a pawimawh thu a chhuahtu te chuan an sawi a ni.

<><><>

MPCB

Mizoram Pollution Control Board (MPCB) hotute chuan kum 2024 kumhlui thlah zana boruak dinhmun chu kum hmasa lam aiin boruak a ti bawlhhlawh nep tih an sawi. Akashvani palai nen an inkawmna ah he thu hi sawiin MPCB hotute chuan Sikulpuikawna Automatic Air Quality Monitoring Station-in boruak dinhmun a chhinchhiah dan atanga a lan danin kum 2024 kum hlui thlah zana halpuah leh halmawi halin kum hmasa lam aiin boruak a tibawlhhlawh nep deuh an ti a, Air Quality Index (AQI) hi kumhlui thlah ni chhun lamah chawhrualin 52.9 a nih lain zanlai dar 12 leh dar 1 inkar halpuah hal vanglaiah chuan 115 a kai chho an ti a. Kum 2023 zanlai dar 12 leh dar 1 inkara AQI erawh 597 lai a ni tih sawiin kum 2023 aiin kumin 2024 ah halpuah hal vanglai zanlai dar 12 atanga dar 1 inkarah AQI chu a let nga (5) laiin a tlahniam tih an sawi.

MPCB chuan boruak tha nei zel thei tura sawrkar hmalakna mipuiin an thlawp kawngah hma an sawn tih sawiin kum hmasa lam aiin halpuah leh halmawi an hal nasa lo an ti a. Boruaka bawlhhlawh nawi leng zinga te zual leh hauhawm zual, taksa chhungril, chuap leh thisena kal tlang thei pawh kum hmasa lam aiin a tlahniam tih an sawi bawk.

Zirchianna atanga a lan danin December ni 31 zing dar 6 leh tlai dar 6 inkar AQI chu kum 2023-ah 13.13 a nih laiin kum 2024-ah erawh 52.9 a ni. Hei hian a entir chu kan Aizawl boruak hian a kum telin bawlhhlaw lam a pan ve zel tihna a ni.

<><><>

VEHICLE REGISTRATION

Transport Department chhinchhiah danin kum 2023 atanga kum 2024 March inkarah lirthei 30,295 ziahluh thar a ni a, Driving License 16,300 pek chhuah a awm bawk. Transport Department in a tarlan danin kum 2023 atanga kum 2024 March Aizawl District-a lirthei register zat chu 21,856 a ni a, Lunglei District ah 2,428 awmin Siaha District ah 690 register a ni a, Champhai District ah 1,405 leh Kolasib District ah 1684 an awm a, Serchhip District ah 785 awmin Lawngtlai District ah 937 an awm a, Mamit District ah 510 an awm bawk a ni.

Transport Department chuan kum 2023 atanga kum 2024 March inkarah hian Driving License 16,300 an pe chhuak a. License an pek chhuah te hi mipui mamawh phur lirthei 282 a ni a, Mimal lirthei License 16,018 a ni bawka ni.

Transport Department Director Pu R. Lalrammawia chuan Motor Vehicle Act hnuaiyah Registration tih vek tur a ni tih sawiin registration number nei lova tlanchhuah chu phalloh a nih thu mipuiten hre nawn turin a duh thu a sawi a. Tunlaih khawehhak lam atangin lirthei ke hnih nei 125 chu mipuiin an lakluh thu leh an khalh thin thu sawiin Dan phalloh anih thu leh 125 lirthei register tur chuan custom clearance tih a ngai a, chumi pawh neilova an khalh thin chu dan phalloh a ni, a ti a. Mi tih palhin a neitute chuan pawisa an chawi tur a ni a, Transport Department in an ngaih pawimawh em em chu Driving License neih a pawimawh thu a sawi bawka ni.

<><><>

FIRST BETA BABY BORN

Ramchhunga Generation Beta nau piang hmasa ber chu Mizorama mi Frankie Remruatdika Zadeng a ni a, December ni 31 zan lai pelh hret dar 12 leh minute 3 khan Synod Hospital Durtlangah a piang a ni. Synod Hospital Durtlang Lawmna Ward Sister Lalchhuanawmi chuan Akashvani Correspondent zawhna chhangin nau piang chu January ni 1, 2025-a piang a nih thu leh a rih zawng chu kg 3 leh gram 120 a ni a ti a, a pian tirhah sawiselna a awmluh thu a sawi a ni.

Kumthar nau piang hmasa ber ‘Generation Beta’ zinga mi Frankie Remruatdika Zadeng a ni a, a nu hi Ramzirmawii niin a pa hi ZD Remruatsanga a ni a, Khatla East cheng niin Unau pianpui hmeichhia pakhat a nei a ni.

Mihring pian kum atanga teh in Generation hi then hran a ni a, Futurist Mark McCrindle chuan heng generation hrang hrang hming hi vuahin, kum 2025 atanga kum 2039 inkara piang te chu “Generation Beta”(Gen Beta) tih vuah an ni. Mizorama Naupang piang hmasa ber Frankie Remruatdika Zadeng hi India rama kum 2025 a piang hmasa ber ni a chhinchhiah niin, India rama Gen Beta nausen hmasa ber a ni bawka.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar hi puan leh a ni ang.

<><><>

PRISON STATUS

Mizorama Prisons department hnuaiyah tan in hrang hrang, mi 1,386 awm theihnaah mi 1,566 an tang mek a, awm thei zata hisap aiin mi 406 in an tam. Kumhlui December ni 30-a Prisons department in an tarlan danin Aizawla Centrail Jail leh Central Women Jail chu tang awm tura hisap aia an tam zualna pahnih a ni a. Central Jail-ah hian mi 438 tang thei tura hisap a nih laiin mi 791 an tang a, Central Women Jail-ah chuan mi 96 tang thei tura hisap an nih laiin mi 118 leh an nu ten an hruai luh naupang 3 an awm mek a ni. District Jail Lunglei, Siaha leh Champhaiah te tang thei tura hisap aia tam an tang a. Siaha, Kolasib, Lawngtlai, Serchhip leh Mamit-ah te tang thei zat tur hisap aia tlem an tang thung a ni. Hetihruah hian Prisons department hotute chuan Jail tang zat chuan danglam reng a nih thu an sawi a ni.

Mizoram puma Jail hrang hrangah thubuui ngaihtuah mek tang mipa 788 leh hmeichhia 130, damchung tang tur mipa 54, hrehawm taka lungin tang tura tih (rigorous imprisonment) mipa 323 leh hmeichhia 22, tang pangngai (simple imprisonment) mipa 236 leh hmeichhia 8, an vaiin mipa 1401 leh hmeichhia 160, bakah an nu ten an hruai loh theih loh naupang 5 an awm mek a ni.

Prisons department hotute sawi danin SASCI hnuaiyah Mizoram Jail hrang hrang thawm that nan cheng vbc 55 an neih thu Akashvani an hrilh a. District tharah pawh hma lak zel a nih thu sawiin Khawzawlah chuan district jail tur ram neih a nih tawh thu leh LSC pawh tihfel a nih tawh thu an sawi a. Saitualah chuan district jail sak tawh a nih thu leh a la hman tan loh thu an sawi a. Hnahthialah chuan ram an neih fel tawh thu leh LSC an buaipui mek thu an sawi bawka ni.

<><><>

SR SCIENTIST CHIDAMBARAM PASSES AWAY

India nuclear programme-a mi pawimawh tak, nuclear scientist lar, Dr. Rajgopal Chidambaram-a chu hun engemawchen a damloh hnuah tukin khan Mumbai damdawiin pakhtah a thi a, kum 88 mi a ni.

Dr. Chidambaram-a hi India ram nuclear ralthuam programme dinna-a mipawimawh tak a ni a, a kaihhraina hnuaiyah kum 1974 khan a vawi khat nan India-ah hlawhtling takin nuclear ralthuam enchhin a ni a, kum 1998-ah Pokhran-II, hlawhtling taka enchhin lehin India chu nuclear ralthuam nei ram zinga chhiar tel a ni ve ta a ni.

Dr. Chidambaram-a hian dinmun pawimawh tak tak a chelh kual tawh a, sorkar laipui hnuaiyah Principal Scientific Adviser hnate, Bhabha Atomic Research Centre Director nihna te, Atomic Energy Commission Chairperson nihna te pawh a chelh tawh a, kum 1975-ah Padma Shri dawngin 1999-ah Padma Vibhushan a dawng bawk a ni.

<><><>